



ҲУДОД ҲАҚИДА ҲУДОД

ҲУДОД ҲАҚИДА

Шайх Муҳаммад Ҳассон
Ислом Нури таржимаси

Барча ҳамду санолар Аллоҳга хосдир. Биз Унга ҳамд ва истиғфор айтамиз, Ундан ёрдам ва ҳидоят сўраймиз, нафсимизнинг шумлигидан ва амалларимизнинг ёмонлигидан Унинг Ўзидан паноҳ сўраймиз. Аллоҳ ҳидоят қилган кимсани адаштирувчи, адаштирган кимсани ҳидоят қилувчи йўқдир. Мен ягона, шериксиз Аллоҳдан ўзга ҳақ илоҳ йўқ ва Муҳаммад соллаллоҳу алайҳи ва саллам Унинг бандаси ва элчисидир деб гувоҳлик бераман.

«Эй мўминлар, Аллоҳдан ҳақ-рост қўрқиши билан қўрқинглар ва фақат мусулмон бўлган ҳолларингда дунёдан ўтинглар!» (Оли Имрон: 102).

«Эй инсонлар! Сизларни бир жондан яратган ва ундан жуфтини вужудга келтирган ҳамда у икковидан кўп эркак ва аёлларни тарқатган Роббингиздан қўрқингиз! Яна ораларингиздаги савол-жавобларда ўртага номи солинадиган Аллоҳдан қўрқингиз ва қариндош-уруғларингиз (билин ажralиб кетишдан қўрқингиз)! Албатта Аллоҳ устингизда кузатувчи бўлган зотдир» (Нисо: 1).

«Эй мўминлар, Аллоҳдан қўрқинглар, тўғри сўзни сўзланглар! (Шунда Аллоҳ) ишларингизни ўнглар ва гуноҳларингизни мағфират қилур. Ким Аллоҳга ва Унинг пайғамбарига итоат



этса, бас у улуг бахтга эришибди» (Ахзоб: 70, 71).

Сўзларнинг рости Аллоҳнинг Китоби, йўлларнинг яхшиси Муҳаммад соллаллоҳу алайҳи ва салламнинг йўллари, ишларнинг ёмони (динда) янги пайдо қилинганлари, (динда) янги пайдо қилинган барча нарса бидъат, барча бидъат залолат, барча залолат эса жаҳаннамга элтгувчиидир.

Аммо баъд...

Аллоҳ йўлидаги дўстларим! Бугунги сухбатимиз рўзага доир аҳкомлар мавзусида бўлади. Одатимизга кўра, уни бир неча моддаларга бўлиб олиб борамиз:

1. Биринчи: Рўзанинг маъноси ва ҳикмати.
2. Иккинчи: Рўзанинг рукнлари.
3. Учинчи: Рўзани бузувчилар.
4. Тўртинчи: Рўзанинг руҳсатлари ва одблари.
5. Бешинчи: Рўзадаги баъзи хатолар.
6. Биринчи: Рўзанинг маъноси ва ҳикмати

Рўза (Рўзанинг) луғатда тўхталиш, бир нарсадан тийилиш маъносини англаатади. Аллоҳ таоло Марям алайҳассалом тилидан ҳикоя қилиб, айтганидек: «**Мен Раҳмон йўлида рўза тутмоқни назр (аҳд) қилганман, бас, бугун бирон инсонга сўзламайман**» (Марям: 26). Яъни, сўзлашдан тийилишни назр қилганман, маъносидадир.

Шаръий истилоҳда эса тонг отганидан то кун ботгунича ният қилган ҳолда рўзани очиб юборувчи ишлардан тийилиш, маъносида тушунилади.



Рўзанинг машруъ бўлиши ҳикматлари жуда кўп, валиллаҳил ҳамд.

Аллоҳ таоло бандаларига машруъ қилган ҳар қандай ибодат борки, уни етук ҳикмат сабабли машруъ қилгандир, буни билган билади, билмаган билмайди. Бирон ибодат остида яширган ҳикматни билмаслигимиз унинг ҳикмати йўқлигига далил бўлмайди, балки ўша ибодат остидаги Аллоҳнинг ҳикматини билишдан ожизлигимизга далил бўлади. Аллоҳ таоло айтганидек: **«Сизларга жуда оз илм берилгандир»** (Исро: 85).

Бинобарин, рўза ибодати остидаги энг катта ҳикматлардан бири – у Аллоҳдан тақво қилишга сабаб бўлади. Аллоҳ таоло айтади: **«Эй мўминлар, тақволи кишилар бўлишингиз учун сизлардан илгари ўтганларга фарз қилингани каби сизларга ҳам саноқли кунларда рўза тутиш фарз қилинди»** (Бақара: 183).

Тақво – Аллоҳ таолонинг аввалгилар-у охиргиларга қилган тавсиясидир.

Тақво – Ибн Масъуд розияллоҳу анҳу таърифларича, Аллоҳга итоат қилиш ва Унга осий бўлмаслик, Аллоҳни зикр қилиш ва Уни асло унумаслик, Аллоҳга шукр қилиш ва асло куфр келтирмаслик (ношукчилик қилмаслик)дир.

Талқ ибн Ҳабиб тақвога шундай таъриф беради:

Тақво – Аллоҳ томонидан бўлган нур билан Аллоҳнинг тоатида амал қилишдир.. Аллоҳнинг савобини умид қилишдир.. Аллоҳ томонидан бўлган нур билан Аллоҳнинг маъсиятини тарк қилишдир.. Аллоҳнинг азобидан қўрқишдир.



Рўза нафсларни Аллоҳнинг амрларига бўйсуниш ва қайтариқларидан тийилиш орқали Унинг тақвосига ҳозирлайдиган энг улкан ибодатлардан биридир.

Зеро, рўза рўзадорнинг нафсига ва виждонига топширилган бир ибодат бўлиб, унга Аллоҳдан бошқа бирон ташқи назоратчи йўқдир.

Шундан бўлса керак, Абу Ҳурайра розияллоҳу анҳу ривоят қилган ҳадисда Пайғамбар соллаллоҳу алайҳи ва саллам айтганлар: **«Аллоҳ таоло деди: «Одамзотнинг ҳамма амали ўзи учун, фақат рўза бундан мустасно, у Мен учундир ва унинг мукофотини ҳам Ўзим бераман».** Рўза қалқондир. Қай бирингиз рўза тутган бўлса, фахш сўзларни сўзламасин ва бақир-чақир қилмасин. Агар бирор у билан уришса ё ҳақорат қилса: **«Мен рўзадорман», десин. Жоним қўлида бўлган Зотга қасамки, рўзадорнинг оғзидан келувчи ҳид Аллоҳ наздида мушкдан кўра яхшироқдир.** Рўзадорни хурсанд қиласиган икки қувончи бор, бири ифтори олдида, иккинчиси Парвардигорига йўлиққанида» (Муттафакун алайҳ, Бухорий: 4/88-94, Муслим: №1151).

Рўзанинг ҳикматларидан яна бири шуки, нафсни хоҳишларидан тийиш, кибрини синдириш ва ҳаққа бўйсундириш орқали тарбия қилиш ҳосил бўлади.

Рўзанинг етук ҳикматларидан яна бири – Аллоҳнинг ноз-неъматларига ғарқ бўлиб яшаётган бой-бадавлат кишиларга нафақат Рамазонда, балки йилнинг бошқа пайтларида ҳам давомий очлик азобини тортадиган ва ҳатто айримлари очликдан ўлиб кетаётган биродарлари борлигини эслатиб қўйишидир. Ажабмаски, шу сабабли қалби тирик ва ҳамиятли инсонлар инфоқ-эҳсон ва хайру-саҳоват ишларига қўл



урсалар.

Рўзанинг соғлик учун бўлган фойдаларини эса билмайдиган киши топилмаса керак.

Аллоҳнинг ҳикмати нақадар буюк, У нақадар етук ҳикмат соҳибидир! Аллоҳ таоло рост айтганидек: «(Ахир) **яратган зот** (Ўзи йўқдан бор қилган нарсаларни) **бilmасми?!** У **мехрибон ва** (ҳар нарсадан) **хабардор зотдир**» (Мулк: 14).

Иккинчи: Рўзанинг руқнлари

Биринчи руқн: Ният

Ният аслида, барча ибодатларда руқн саналади. У қалб амалларидан бир амалдир. Аллоҳ таоло айтади: «**Холбуки улар фақат ягона Аллоҳга, у зот учун динни холис қилган, Тўғри йўлдан оғмаган ҳолларида ибодат қилишга ... буюрилган эдилар**» (Баййина: 5).

Бухорий ва Муслим Умар ибн Хаттобдан ривоят қилган ҳадисда Расулуллоҳ соллаллоҳу алайҳи ва саллам айтганлар: «**Амаллар ният билан (эътибор қилинади) ва ҳар бир киши учун ният қилган нарсаси бўлади**».

Жумхур фуқаҳолар фарз рўзада ниятни тунда (яъни тонг отмасидан туриб) қилиш лозимлигини айтганлар. Чунки, «Сунан» соҳиблари сахих санад билан Ҳафса розияллоҳу анҳодан ривоят қилган ҳадисда Расулуллоҳ соллаллоҳу алайҳи ва саллам: «**Ким рўза ниятини тун пайтидан қилмаган бўлса, унинг рўзаси йўқдир**», деганлар (Абу Довуд: №2454, Ибн Хузайма: №1933, сахих: Ал-ирвоъ: №914).



Бу фарз рўзага хосдир. Аммо, нафл рўзада ниятни тун пайтидан қилиш фарз эмас, балки тонг отганидан сўнг ҳеч нарса totinmagan бўлса, рўзага кундузида ният қилса ҳам жоиз. Чунки, имом Муслим ва бошқалар Оиша розияллоҳу анҳодан ривоят қилган ҳадисда келадики: «Бир куни Расулуллоҳ соллаллоҳу алайҳи ва саллам олдимга кириб: «(Ейиш учун) **бирор нарса борми?**», дедилар. «Йўқ», дедим. **«Ундаи бўлса, мен (буғун) рўзадорман»**, дедилар. Кейин бошқа бир куни яна олдимга кириб келдилар. Менга ҳайс (хурмо, ёғ, пишлоқ (сузма) қўшиб тайёрланган таом) ҳадя қилинган эди. Расулуллоҳ соллаллоҳу алайҳи ва саллам ҳайсни яхши кўрганлари учун озгинасини олиб қўйган эдим. Шунда мен: «Ё Расулуллоҳ, бизга ҳайс ҳадя қилинган эди. Шундан сизга ҳам олиб қўйган эдим», дедим. **«Қани, қўрсат-чи, буғун кунни рўза билан бошлаган эдим»**, дедилар. Кейин ундан едилар» (Муслим: №1154, Насоий: №2455, Термизий: №733).

Шу ўринда бир савол пайдо бўлади: бир ой рамазон рўзаси учун битта ният кифоя қиласидими?

Жавоб: Уламолар бу борада икки хил сўзга бўлинганлар.

- 1) Моликийлар ойнинг бошида қилинган битта ният бутун ой рўзасига кифоя қиласиди, дейдилар.
- 2) Жумҳур фуқаҳо ҳар бир кун учун шу кечада янги ният қилиш фарз дейдилар, шу фикр қувватлироқ, валлоҳу аълам.

Аллоҳнинг жуда катта раҳмати бўлди, У ниятни тилда қилишни шарт қилмади. Балки, дилда ният қилиш кифоя бўлди. Қолаверса, рўзадорнинг сахарлик қилиши унинг учун ниятга ўтади.



Иккинчи руҳи: Тонг отганидан кун ботгунига қадар рўзани очиб юборувчи барча нарсалардан тийилиш

Чунки, Аллоҳ субҳанаҳу ва таоло айтади: «**Ва то тонгдан оқ ип қора ипдан ажраладиган пайтгача еб-ичаверинглар. (Ва то тонгда субҳ содик пайдо бўлгунча еб-ичаверинглар.) Сўнгра кечгача рўзани бенуқсон қилиб тутинглар!**» (Бақара: 187).

Оқ ипдан мурод тонгнинг оқариши, қора ипдан мурод эса тун қоронғулигидир.

Чунки, «Саҳиҳайн»да ривоят қилинган ҳадисда Адий ибн Хотим розияллоҳу анҳу айтади: «**Оқ ип қора ипдан ажраладиган пайтгача еб-ичаверинглар**» ояти нозил бўлганида мен оқ ва қора арқонни олиб, ёстиғим остига қўйиб олдим. Тунда унга қаардим, бироқ (оқ-қоралиги) ажралмас эди. Тонг отганидан кейин Расулуллоҳ соллаллоҳу алайҳи ва саллам ҳузурларига бориб, хабар берган эдим, у зот кулдилар ва: «**Ундай бўлса, сизнинг ёстиғингиз жуда кенг экан. У кечанинг қоронғулиги ва кундузнинг ёруғлигидир**», дедилар (Муттафақун алайҳ).

Шубҳасиз, **учинчи руҳи рўзадорнинг шахсиятига тегишли бўлиб, рўза тутивчи киши мусулмон, балоғатга етган, оқил ва рўза тутишга қодир бўлмоғи шарт қилинади.** Бу эса барчага аниқ нарсадир, иншооллоҳ.

Учинчи: Рўзани бузувчилар

1) Жимоъ

Бу рўзани бузувчи нарсаларнинг энг каттаси ва гуноҳи каттароғидир.



Рўзадор киши Рамазоннинг кундуз кунида, рўза фарз бўлган ҳолида жимоъ (жинсий алоқа) қилса, унинг рўзаси бузилади ва унга қазо ҳамда муғаллаз (оғирлаштирилган) каффорат лозим бўлади. Каффорат қуидаги тартибда бўлади: бир мўмин қулни озод қиласди. Агар тополмаса, икки ой сурункали равишда, ўртада бир кун ҳам қолдирмай рўза тутади. Фақат икки ҳайит ва ташриқ қунлари каби шаръий узр ёки касаллик ва сафар каби ҳиссий узр бўлган ҳолдагина ўртада ўша қунлари рўза тутмаслиги мумкин. Ўртада бир кун бўлса-да узрсиз рўза тутмаса, каффорат рўзасини яна бошидан бошлаб тутиши лозим бўлади. Агар икки ой пайдар-пай рўза тутишга қодир бўлмаса, олтмишта мискинга таом беради.

Фуқаҳолар ушбу каффоратлар ихтиёрийми ёки тартиб бўйича бўлиши лозимми эканида ихтилоф қилганлар. Қувватлироқ гап - унинг тартиб билан берилиши лозимлигидир. Бу жумхур уламолар фикридир.

Бунга далил Бухорий ва Муслим ривоят қилган қуидаги ҳадисдир.

Абу Ҳурайра розияллоҳу анҳудан ривоят қилинади: «Биз Пайғамбар соллаллоҳу алайҳи ва саллам билан ўтирган эдик, бир киши келиб: «Ё Расулуллоҳ, ҳалок бўлдим», деди.

«Саҳиҳ»даги бир ривоятда: «Ё Расулуллоҳ, ёниб кетдим», деди.

«**Нима бўлди?**», дедилар Расулуллоҳ соллаллоҳу алайҳи ва саллам.

«Рўзадор ҳолимда аёлимга қўшилиб қўйдим», деди у.

Расулуллоҳ соллаллоҳу алайҳи ва саллам: «**Кул озод қила оласанми?**», деб сўрадилар.



У: «Йўқ», деди.

«Узлуксиз икки ой рўза тутиб беришга қодирмисан?», деб сўрадилар.

«Йўқ», деди.

«Олтмишта мискинга таом берса оласанми?», дедилар.

«Йўқ», деди.

Набий соллаллоҳу алайҳи ва саллам жим туриб қолдилар. Шу орада у зот ҳузурларига бир сават хурмо олиб келиб қолинди.

«Савол сўровчи қаерда қолди?», деб сўрадилар у зот.

Оиша розияллоҳу анҳо ривоятида: **«Бояги ёниб кетган одам қани?»,** деб сўрадилар.

«Шу ердаман», деди ҳалиги киши.

«Шуни олгин-да, садақа қилиб юбор», дедилар.

Шунда ҳалиги киши: «Ўзимдан кўра ҳам фақирроқларгами? Аллоҳга қасамки, (Мадинанинг) икки ҳарраси (яъни, икки чеккасидаги тошлок) оралиғида менинг хонадонимдан кўра фақирроқ хонадон йўқ», деди.

Расулуллоҳ соллаллоҳу алайҳи ва саллам қулиб юбордилар, ҳатто озиқ тишлари кўринди. Сўнгра: **«Буни аҳли-оилангга едир»,** дедилар (Ином Бухорий ривояти, Фатхул Борий: №1936, Ином Муслим ривояти: №3/139).



Фуқаҳолар Рамазоннинг кундуз кунида эри жимоъга мажбурлаган аёлнинг ҳукми борасида ҳам уч хил сўзга ихтилоф қилганлар.

Кувватлироқ гап шуки, у аёлга факат қазо лозим бўлади, каффорат лозим бўлмайди, валлоҳу аълам. Унга каффоратни лозим қиласиган саҳиҳ далил келмаган.

2) Бўса олиш, силаб-сийпаш, истимно (онанизм, капаки) каби йўллар билан ихтиёрий равишда маний (сперма) тўкиш.

Чунки, бу нарса рўзада сақланиш шарт бўлган шаҳват жумласига киради. Ҳадиси қудсийда айтилганидек: «...**Таоми, шароби ва шаҳватини Мени деб тарк қиласиди**» (Имом Бухорий ривояти).

Ким Рамазоннинг кундуз кунида шаҳват билан маний тўкса, унинг рўзаси бузилади ва факат қазо вожиб бўлади. Чунки, каффорат факат жимоъда бўлиши событ бўлган. Бундан бошқача сўзни айтадиган кишиларнинг ҳужжати йўқ, валлоҳу аълам.

Эҳтилом (яъни шаҳвоний туш) билан маний тўкилган ҳолда рўза бузилмайди. Чунки, эҳтилом рўзадорнинг ихтиёрисиз содир бўлади. Агар рўзадор Рамазоннинг кундузида ухласа ва уйғонгач ўзининг эҳтилом бўлганини билса, ғусл қиласиди ва рўзасини давом эттиради. Унинг рўзаси дуруст саналади.

Аммо, агар рўзадор маний тўкишсиз аёлини ўпса ё қучса, бу билан рўзаси бузилмайди. «Саҳиҳайн»да Оиша розияллоҳу анҳодан ривоят қилинади: «Расулуллоҳ соллаллоҳу алайҳи ва саллам рўзадор ҳолларида хотинларини қучоқлар ва ўпар эдилар. Лекин у зот сизларнинг ичингиизда ўз шаҳватига тўла эга бўлган киши эдилар»



(Бухорий: №1/480, Муслим: №3/135).

Ушбу баҳсга тегишли яна бир муҳим савол қолди. Яъни, кечаси аёли билан қовушган, сўнг ухлаган ва то бомдод азонигача ғусл қилмаган кишининг ҳукми нима бўлади?

Жавоб шуки, унинг рўзаси дуруст бўлади. Чунки, Бухорий ва Муслим Оиша ва Умму Салама розияллоҳу анҳумодан ривоят қилган ҳадисда айтилишича, Пайғамбар соллаллоҳу алайҳи ва саллам эҳтиломдан эмас, жимоъ туфайли жунуб бўлиб тонг оттирас, сўнг Рамазон рўзасини тутар эдилар.

3) Қасдан ейиш ёки ичиш.

Яъни, оғиз ё бурун йўли орқали ҳар қандай озуканинг ичга кириши. Аллоҳ таоло айтади: «**То тонгдан оқ ип қора ипдан ажраладиган пайтгача (Ва то тонгда субҳ содиқ пайдо бўлгунча) ебичаверинглар. Сўнгра кечгача рўзани бенуқсон қилиб тутинглар!**» (Бақара: 187).

Аммо, бир киши Рамазон кундузида эсида йўқ еб-ичиб қўйса, унга ҳеч нарса лозим бўлмайди, рўзаси дуруст бўлади. Чунки, Бухорий ва Муслим Абу Ҳурайра розияллоҳу анҳудан ривоят қилган ҳадисда Набий соллаллоҳу алайҳи ва саллам: «**Ким рўзадор ҳолида унутиб еса ёки ичса, рўзасини охирига етказсин. Чунки уни Аллоҳ едериб, ичирибди**», деганлар (Муттафақун алайҳ, Бухорий: 1/481, Муслим: №3/160).

4) Қасдан қусиш

Яъни, рўзадор ошқозонидаги нарсани оғиз орқали чиқариб ташлаши.



Ким шундай қилса, унинг рўзаси бузилади ва қазо лозим бўлади. Аммо, ихтиёrsиз равишда ҳосил бўлган кусишининг зарари йўқdir, бундай ҳолат юз берганда рўзасини давом эттиради ва рўзаси дуруст саналади.

Чунки, Термизий ва Абу Довуд ривоят қилган, Ҳоким «Мустадрак»да сахих санаган, шайхулислом Ибн Таймия ҳам сахих санаган ва «Рўзанинг ҳақиқати» китобида келтирган ҳадисда келадики, Расулуллоҳ соллаллоҳу алайҳи ва саллам: **«Рўзадор ҳолида ихтиёrsиз қусган кишига қазо лозим эмас. Қасддан ҳаракат қилиб қусса, рўзасининг қазосини тутиб берсин»**, деганлар

5) Аёл кишидан ҳайз ва нифос қони келиши

Аёл киши қачон ҳайз ё нифос қони келганини кўрса, рўзаси бузилади. Куннинг аввалги қисмида бўладими, охиридами, кун ботишига бир неча дақиқа қолгандами, фарқи йўқ. Неча кун тутолмаган бўлса, покланганидан кейин шунча кун қазо тутиши лозим бўлади. Чунки, «Сахих Муслим»да келган ҳадисга кўра, Оиша розияллоҳу анҳодан: «Нима учун ҳайзли аёл рўзанинг қазосини тутади-ю, намознинг қазосини ўқимайди?», деб сўралганда: «Биз -Расулуллоҳ соллаллоҳу алайҳи ва салламнинг даврида - ҳайз кўтар, шунда рўзанинг қазосини тутишга буюрилар, намознинг эса қазосини ўқишга буюрилмас эдик», деб жавоб берганлар.

Рўзани бузувчи ишларнинг энг машҳурлари мана шулардан иборат.

Тўртинчи: Рўзанинг рухсатлари ва одблари

Аллоҳ таоло бандаларидан нокулайлик ва қийинчиликни кетказиши мақсадида рўзага доир бир неча рухсат ва енгилликларни берди.



Жумладан:

1) Бемор киши, шунингдек рўза тутишга қийналадиган мусофир киши Рамазон кундузида рўзасини очиши мумкинлиги.

Чунки, Аллоҳ таоло айтади: «**Ва ким ҳаста ёки мусофир бўлса, у ҳолда** (рўза тутолмаган кунларининг) **саноғини бошқа кунларда** (тузалгач ёки сафардан қайтгач) **тутади. Аллоҳ сизларга енгилликни истайди, сизларга оғир бўлишини истамайди**» (Бақара: 185).

2) Рўзадор истаган пайтида, заволдан олдинми, заволдан кейинми, фарқсиз, мисвок ишлатиши мумкинлиги. Мана шу гап саҳиҳ-тўғри гапдир, иншооллоҳ. Баъзи аҳли илмлар заволдан (яъни, кун тиккадан оғанидан) кейин мисвок ишлатиш жоиз эмаслигига Алий розияллоҳу анхудан марфуъан ривоят қилинган мана бу ҳадисни далил қилишади: «**Агар рўза тутсаларингиз, эрталаб мисвок ишлатинг, кечки пайт мисвок ишлатманг**». Байҳақий ва Доракутний ривоят қилган ушбу ҳадис жуда заифдир. (Қаранг: «Ас-силсилатуз-заифа: №401»).

Мисвок билан оғизни тозалаш рўзадор учун ҳар доим машруъдир. Хусусан, нас (очиқ далил) келган қуйидаги олти ўринда:

1. Биринчи: Намоз олдидан;
2. Иккинчи: Таҳорат қилганда;
3. Учинчи: Уйга кирганда;
4. Тўртинчи: Уйқудан турганда;
5. Бешинчи: Қуръон ўқиши олдидан;
6. Олтинчи: Оғиз ҳиди ўзгарганида.



3) Рўзадор томоғига сув кетиб қолмаслиги учун ўта муболағали қилмаган (яъни, чуқур тортмаган) ҳолда оғиз ва бурунга сув олиб чайиши ҳам мазкур рухсатлар жумласига киради. Термизий, Насойй, Абу Довуд ва Аҳмад Лақит ибн Сабра розияллоҳу анхудан ривоят қилган ҳадисда Расулуллоҳ соллаллоҳу алайҳи ва саллам айтдилар: «...Рўзадорлигингдан бошқа пайтда истиншоқни муболағали қил (яъни бурунга чуқур сув ол)» (Саҳих, Термизий: №38, Насойй: №1/66, Абу Довуд: №142, 143, 144, Аҳмад: №4/33).

4) Таом ҳозирлаётган киши таом пишириш асносида унинг таъмини (тузини) тотиб кўришига рухсат этилади, шу шарт биланки, томоғига кетиб қолмаслиги керак.

5) Рўзадор иссиқ ва ташналик шиддатини ўзидан енгиллатиш мақсадида сув ва бошқа нарсалар билан салқинланиши жоиз. Абу Бакр ибн Абдурраҳмон Расулуллоҳ соллаллоҳу алайҳи ва салламнинг сахобаларидан бирларининг: «Расулуллоҳ соллаллоҳу алайҳи ва салламни рўзадор ҳолларида ташналик ё иссикдан бошларига сув қуяётганларини кўрганман», деганини ривоят қилган (Имом Молик ва Абу Довуд ривояти).

6) Рўзадор агар зарур бўлса, кўзига дори қуйса ёки сурма қўйса, унинг таъмини томоғида ҳис қилса ҳам рўзаси очилмайди. Чунки, бу нарсалар емак-ичмак ҳам, унинг маъносида ҳам эмас. Қулоққа дори томизиши ва жароҳатга малҳам қўйиш ҳукми ҳам шундай. Шунингдек, агар рўзадорда нафас қисиши касаллиги бўлса, нафаси қисган пайтда дори пуркагич ишлатишига ҳам рухсат берилади ва унинг рўзаси дуруст бўлади. Чунки, нафас йўлинин очиш учун пуркалган ушбу модда ҳам емак-ичмак ва унинг маъносидаги нарса саналмайди.



Рўзанинг бир қанча одoblари бор. Жумладан:

1) Саҳарлик қилиш. Чунки, Пайғамбар соллаллоҳу алайҳи ва саллам саҳарлик қилишга буюриб, айтганлар: «**Саҳарлик қилинглар, зеро саҳарлика барака бордир**» (Муттафақун алайҳ).

Саҳарлик озгина егулик билан ҳам, бир қултум сув билан бўлса ҳам амалга ошади. Расулуллоҳ соллаллоҳу алайҳи ва саллам: «**Ҳар қандай саҳарлик таоми баракадир. Сизлардан бирингиз гарчи бир қултум сув билан саҳарлик қилса-да, саҳарликни тарқ қилманглар!** Чунки Аллоҳ ва унинг фаришталари саҳарлик қилувчиларга салавот айтиб туради», деганлар (Имом Аҳмад ривояти).

Саҳарликни субҳга қадар давом эттириш суннатdir. Чунки Набий соллаллоҳу алайҳи ва саллам шундай қилганлар. Анас ибн Молик розияллоҳу анҳудан ривоят қилинади: «Расулуллоҳ соллаллоҳу алайҳи ва саллам Зайд ибн Собит билан бирга саҳарлик қилдилар.

Саҳарликдан фориғ бўлгач, Расулуллоҳ соллаллоҳу алайҳи ва саллам туриб, намоз ўқидилар». Анас розияллоҳу анҳудан: «Саҳарликдан фориғ бўлишлари билан намозга киришишлари ўртасида қанча вақт бор эди?» деб сўралганда: «Бир киши эллик оят қироат қилиши миқдорича», деб жавоб бердилар (Бухорий: 4/138/1921).

2) Кун ботиши билан ифтор қилишга (яъни оғиз очишга) шошилиш. Саҳл ибн Саъд розияллоҳу анҳудан ривоят қилинган ҳадисда Расулуллоҳ соллаллоҳу алайҳи ва саллам айтдилар: «**Одамлар модомики ифтор қилишга шошилар эканлар, яхшилик узра бўлаверадилар**» (Имом Бухорий ва имом Муслим ривояти).



3) Ифтор (яъни, оғиз очиш) пайтида дуо қилиш. Чунки, рўзадорнинг дуоси қайтарилемайди. Расулуллоҳ соллаллоҳу алайҳи ва салламдан собит бўлган энг гўзал дуолардан бирини Ибн Умар розияллоҳу анхумо шундай ривоят қиласиди:

»

Расулуллоҳ соллаллоҳу алайҳи ва саллам ифтор қилган пайтларида:
«Чанқоқ қонди, томирлар хўлланди ва ажр собит бўлди, иншааллоҳ», дердилар (Абу Довуд: №2357).

3) Фийбат, чақимчилик ва ёлғончиликни тарк қилиш.

Севикли дўстим, қорнингиз емак-ичмакдан қандай тийилган бўлса, бошқа барча аъзоларингиз ҳам гуноҳу маъсиятлардан ана шундай тийилмоғи лозим.

Аллох жалла ва алодан барчамизни сўзларга қулоқ тутиб, унинг яхшисига эргашадиган кишилардан килишини сўрайман.

Бешинчи: Рұзадаги бәъзи хатолар

Шубҳасиз, рўзадорлар Аллоҳ таолонинг энг яхши бандаларидан бўлишади. Бироқ, баъзи рўзадорлар айрим ҳолларда билиб-билмай айрим хатоларга ҳам ийл қўйиб қолишади. Жумладан:

1) Баъзилар Рамазоннинг ilk кунларида ибодатга бошқача бир шавқ билан иқбол қилишади, намозларни жамоат билан адо этишга эътибор беришади. Куръон тиловат қилишади, зикру истиғфорларни кўп



айтишга ҳаракат қилишади, таровиҳ намозларига иштиёқ билан келишади. Бир неча кун ўтганидан кейин аста-секин иштиёқлари пасайиб, ялқовликка берилиш ҳоллари кўрина бошлиайди. Севикли дўстим, Расулуллоҳ соллаллоҳу алайҳи ва салламнинг мана бу сўзларини ёдингиздан чиқарманг: «**Амалларнинг яхшироғи оз бўлса ҳам давомлироқ бўлганидир**» (Муттафақун алайҳ). Яна у зот: «**Амаллар фақат хотималарига қарабдир**», деганлар (Бухорий: №6606, Муслим: №112).

2) Айрим рўзадорлардан содир бўладиган хатолардан яна бири – қўполлик, тошбағирлик, рўза тутган одам бўлиб, қўл остидагилар билан бўлсин ё бошқалар билан бўлсин, ёмон муомалада бўлишдир. Нима, рўза сизни қўполликка буюрадими?! Ё тошбағирликка, хунук муомалага ундейдими?! Асло ундей эмас!! Рўза барча фазилат ва яхши хулқлар устида тарбия қиласидиган мадрасадир. «Саҳиҳайн»да келган Пайғамбар соллаллоҳу алайҳи ва салламнинг мана бу насиҳатларини асло эсингиздан чиқарманг: «**Рўза қалқондир. Қай бирингиз рўза тутган бўлса, фаҳш сўзларни сўзламасин ва бақир-чақир қилмасин. Агар бирор уришса ё ҳақорат қилса: «Мен рўзадорман», десин**» (Муттафақун алайҳ).

3) Айрим рўзадорлардан содир бўладиган хатолардан яна бири – улар Рамазонни уйқу, ялқовлик ва истироҳат учун қулай фурсат деб билишади. Айримларни кўрасизки, кун бўйи ухлайди, баъзан намозларни ҳам зое қиласи, кейин кечаси билан бедор бўлади. Баъзилари: «**Рўзадорнинг уйқуси ҳам ибодатдир**» деган ҳадисни ҳужжат қилишади, ваҳоланки бу ҳадис заифдир (Қаранг: «Ас-силсилатуз-заифа: №4696»).

4) Катта хатолардан яна бири – эҳтиёждан ортиқча егуликлар



ҳозирлаб, қоринлар ёрилгудек еб-ичиб, кейин ортиб қолганини ахлатга ташлайдилар. Бундай қилиш исроф ва ҳаромдир. Қолаверса, бу рўзадан кўзда тутилган ҳикматга ҳам зиддир. Мана бу гап жуда топиб айтилганки: «Сизлар қозонлаб овқат еб, чељаклаб сув ичиб, кун бўйи ухлаб, яна ўзингизни қаҳрамон қилиб кўрсатасизми?!».. Мақсадимиз, ўртача бўлайлик ва ҳаддан ошмайлик, дейиш холос. Аслида, бизнинг Аллоҳ бандаларига ҳалол қилиб қўйган нарсаларни ҳаром қилиш ниятимиз йўқ.

Буюк арш сохиби бўлган Парвардигоримиздан рўзаларимизни, тунги намозларимизни, закотларимизни қабул қилишини сўраймиз. У бунинг эгаси ва бунга қодирдир.

2010 йил 22-июл